

dvoranom „Pionir” priredena velika dobrodošlica. Sutradan „plamen štafeta” nastavila je put kroz Crnu Goru, Kosovo, Makedoniju, Srbiju, Vojvodinu. Novi Sad bio je domaćin svečarske manifestacije u ime „ostatka istočnog pravca” Olimpijskog plamena. Potom je Plamen nastavio svoj završni put preko Rume, Loznice, Zvornika, visova Majevice, Tuzle, Kladnja, Sokoca, visova Romanije, Jahorine i Pala do svog spuštanja u Sarajevo 7. februara.

PROMOCIJA OLIMPIJSKE BIBLIOTEKE

Višegodišnje uporno i sistemsko davanje naglasaka značenju propagande svake vrste, kao nezamjenjivog oblika stvaranja ukupne olimpijske atmosfere u gradu, zemlji i svijetu, ovih dana pokazalo je životnu ispravnost početnog opredjeljenja organizatora XIV ZOI Sarajevo '84. Jučerašnja (4. februar 1984) prezentacija Olimpijske biblioteke u Glavnom press-centru u Skenderiji to je ilustrovala snažnom argumentacijom.

U minule četiri godine priprema Sarajevske olimpijade pripremljeno je za organizatore i učesnike Igara više od 80 žurnalističkih i publicističkih naslova u tiražu od milion primjeraka. Snimljeno je i šest dokumentarnih olimpijskih filmova, među kojima i film „Sarajevo Vas očekuje”, koji je vidjelo oko dvije i po milijarde ljudi širom svijeta. Uz ovo, organizovana je i akcija „Hiljadu izložbi u hiljadu gradova” koja je realizovana u 1460 gradova u zemlji i svijetu.

Bogatu izdavačku djelatnost upotpunjavale su i razne druge publikacije - nedjeljnik „Press-bilten” sa 147 brojeva; mjesečnik „Olimpijski informator” koji je u završnici priprema postao dnevno izdanje; revija „Sarajevo '84”; deset tehničkih brošura o olimpijskim sportovima; „Zvanični olimpijski vodič” u 100.000 primjeraka; „Činjenice o XIV ZOI” na našem, engleskom, francuskom i njemačkom jeziku u 62.000 primjeraka; „Kulturni program” u 7.000, „Informator o saobraćaju” u 7.000, „Olimpijski plamen” u 4.000, „PTT informator” u 7.500, „Vodič kroz olimpijska sela” u 4.500, „Vodič za novinare” u 5.000; razni prospekti u 500.000 primjeraka itd.

Sarajevo je, na koncu, uoči početka Igara, izbrusilo na poseban način i osjećanje za „sitnice” koje, ipak, kao pojave, kao primjeri, kao detalji, kao pažnje, upotpunjavaju osobenu šansu iskazivanja vlastite duše jednog gostoljubivog grada.

Primjera je više.

Upravo danas (5. februar 1984), na primjer, u Olimpijskom selu u Mojmilu upriličena je svečanost na kojoj će domaćini, na najprijatnije iznenađenje gostiju, uz prigodan program čestitati rođendan nekolicini učesnika - sportista ove Olimpijade i stanovnika ovog Olimpijskog sela - Jan Lehman (Poljska), Li Yueming i Li Xiaming (Kina), Herbert Renoth (Njemačka), Markus Hubrich